

東洲草堂文鈔

東洲艸堂文鈔卷十八

道州 何紹基 子貞

碑誌

署乍浦同知浙江候補運判周君芋生墓誌

周君芋生既卒之明年余至金陵晤君弟子堅知殯存城南能仁寺步往哭之越日其孤翼洙持狀來請誌其納壙之石余旣姻連摯交痛其沈下僚負才氣不竟所志足爲時事惜也謹按狀書之曰君諱詒棫字左璋以乾隆五十七年八月初一日生故號芋生世爲湖南湘潭人曾祖昭俊祖世宇父系英由翰林直上書房南書房官戶部口侍郎仁宗時註誤奪職旋有硃諭謂其素性鯁直

今上登極卽起用再至貳卿者也配謝夫人生于三長銘恩季
詒僕君爲其次性沈毅尙志節門內孝謹爲人謀赴義如飢渴
於詩古制藝皆務爲深微奧衍光采幽懿仿顏平原書肖其神
骨旣失怙恃家益貧年踰強仕又秋試屢折乃醵資援例得運
判需次浙中道光十六年因浙省鹽務積疲

特旨命撫臣查辦浙鹽分四所甯紹二所轄浙東嘉所轄浙西
之杭湖江蘇之常鎮惟松所轄蘇松二郡事關鄰省鉅弊尤深
中丞烏公察君才檄往松所君先條列利弊數千言皆准行旣
至革蠹商除浮費章式周備未半年課增三萬商亦以無累越
次署嘉松分司絕商人供侍又口務每事先議酬費君曰吾革
他人費顧自議費乎且吾爲辦公來非爲罔利廉直振動離務
日起超攝甯紹副使因審餘姚私漕案已定讞有御史某以非

刑勘審風聞入奏 欽使湯公吳公往訊廉其誣奏交巡撫訊
辦得開復子罰俸引見仍回浙嘆夷之陷定海也中丞劉公以
乍浦爲逼處要地委署海防同知勉之曰離員攝海疆向豈有
是乎深知足下才又名臣子也迫自効浙西門戶故以屬君旁
人代爲憂危君感知已一晝夜馳往其地先經受礮方戒嚴急
籌防禦勤團練劉公令沿海守險地築土堡灌以水爲禦礮計
檄甫下而公以巡海出各處多失措君已得四十餘堡兼傳竹
排防雪壓公詫其速君實先爲之與中丞若合符也市舶役夫
千餘人選彊力者九百人爲練勇計或以經費爲疑君乃日練
三百人餘仍自食力三日更遍供億不煩奸謀屏迹乍浦海塘
外皆鐵板沙惟閘口天后宮前及湯山葫蘆城隅近深水洋議
創立兩礮臺以制夷舸上官謂然飭營縣襄辦專屬君以司帑

董工侵漁既絕工作堅緻又議製礮鎖法杜奸人鎔錫塞礮眼之弊中丞頒其式於各海口君竟以心力勞瘁患喉痺以道光二十一年四月六日卒於官吏務方殷忽焉撒手任事如君能無遺憾哉君雖才識峻勁而常自養以和彈琴賦詩意泊如也憶二十年前先文安公與尊人侍郎公同官於朝兩家子姓過從君嘗從劉君柏隣所得名琴曰紅連珠其黑連珠者歸吾弟子穀歿已三年君亦化去十閱月矣人琴之感友生兄弟之戚誌芋生悲子穀又念子堅之痛芋生也君配王安人子翼洙監生翼浙女四以二十二年葬君於□□山之原

先考文安公墓表

公諱凌漢字雲門一字仙槎姓何氏世居道州東門外五如石之左明經茂才相繼不絕者十餘世奉政公諱泰來由明萬曆

拔貢生仕至貴州普安州知州爲同居闔門始祖實公之七世祖也曾祖諱蓋增生祖諱志儀廩生考諱文繪廩生妣鄭太夫人三世皆

誥贈至光祿大夫妣一品夫人少失怙恃孤苦淬厲由嘉慶六年拔貢生授吏部七品京官十年成一甲三名進士授翰林院編修官至 經筵講官戶部尙書計先後任順天府府尹兼署者十二年五署吏部尙書於工部戶部侍郎尙書皆久任大要務恤人才持大體抑奔競崇樸實與人和而不同爲廣東福建山東浙江順天鄉試考官督學山東浙江充乙未科會試副總裁所拔士以根柢器識爲先律身嚴正獨坐必斂容治家整肅如官府以書名重海內行筆動遵古法其莊敬日強天性自然而加之人事焉服官四十年未嘗以瑕尤干吏議荷

兩朝眷倚不少衰道光二十年二月五日薨於位距生於乾隆三十七年八月二十五日巳時年六十有九

特旨贈太子太保

賜祭葬謚文安 國朝謚法勤學好問曰文止於義理曰安配
廖夫人子紹基翰林院編修紹業四品廕生候選縣主簿出嗣
伯父健園公先歿紹祺紹京皆舉人以明年四月葬公於長沙
谷山下九于嶺之陽昔伯父以丁酉歲葬於長沙之東鄉公歎
曰家無一畝歸里爲艱吾它日其亦將卜兆於湘中矣今諸孤
才孱奉厝河西若符夙命非得已也烏乎痛哉謹表

先考文安公墓誌

道光二十年春二月五日戶部尚書道州何文安公薨於位秋
八月孤子紹基等奉柩南歸二十一年夏四月卜葬於長沙谷

山下九子嶺之陽泣而書其藏幽之石曰公諱淩漢字雲門一字仙槎先世自宋南渡時由青州益都至道州居東門外五如石之左明經茂才儒業相繼十二世至奉政公諱泰來由明萬厯拔貢生仕至貴州普安州知州爲同居闔門始祖寶公之七世祖也六世祖諱其諤廩生奉例充國子監生鴻臚寺主簿五世祖諱鳴鳳廩生鼎革之際臨貢堅辭高祖諱之濱增生曾祖諱盡增生祖諱志儀廩生考諱文繪廩生妣鄭太夫人曾祖祖考皆

誥贈至光祿大夫妣皆一品夫人公由嘉慶六年辛酉科拔貢生朝考一等爲吏部文選司七品京官中式甲子科舉人乙丑科一甲三名進士授翰林院編修升國子監司業左春坊左中允司經局洗馬翰林院侍講侍讀右春坊右庶子國子監祭

酒翰林院侍讀學士通政使司副使順天府府尹大理寺卿署
兵部右侍郎都察院左副都御史工部右侍郎管理錢法堂事
務兼署禮部左侍郎調吏部右侍郎兼管順天府府尹事務調
戶部左侍郎兼署戶部右侍郎管理錢法堂事務調吏部右侍
郎仍署戶部右侍郎升都察院左都御史工部尚書調戶部尚
書五署吏部尚書歷充 文穎館纂修 國史館纂修總纂

日講起居注官

武英殿提調

文淵閣校理

咸安宮總裁

丁卯科廣東副考官戊辰

恩科順天同考官己卯科福建正

考官壬午科山東正考官提督學政辛卯科浙江正考官提督

學政乙未科會試副總裁教習庶吉士己亥科順天副考官充

經筵講官四次直講公薨

上震悼

特旨贈太子太保

賜祭葬謚文安

國朝謚法勤學好問曰文止於義理曰安伏

惟公少失怙恃孤陋困苦種學立名遭逢

知遇位業崇茂孝友敦篤之性刻厲敬慎之學文章根柢潤澤之遠立

朝四十年忠勤精白嘉謨碩義始終

眷倚之盛著於

諭賜祭文碑文載在

國史列傳及儀徵相國阮公所爲神道

碑銘略具於紹基等所撰行述茲不敢敘錄恐挂漏爲罪烏乎

谷山之原氣清而紆南望先人墳墓八百里間同山共幹東望

蘭陵五十里而近伯父健園公之墓在焉公庶其妥神於茲土

以佑其子孫乎烏乎痛哉其不可知也已公生於乾隆三十七

年八月二十五日巳時年六十有九配廖夫人子四紹基翰林院編修紹業四品廕生候選縣主簿出嗣伯父先卒紹祺紹京皆舉人謹志

先妣廖夫人墓表

道光二十九年十二月初五日寅時母廖夫人棄養於京師紹基等奉柩南旋以咸豐元年正月十五日葬長沙縣北原豐壩之回龍坡泣而表於墓曰道州廖氏世居西北鄉小坪村外祖贈承德郎諱發點配何安人母明慧幹識于歸先府君何文安公作苦助學力扛曰磴紹基紹業孿生甫三晨冒嚴寒負兒行汲先公拔貢入都母提攜三子就育於舅氏嘗襁兒入山拾薪竹枝傷左目後訖不癒常歎曰吾昔過耐勞苦此目所以志也先公起家詞館以清勤正直受

兩朝知遇歷坊局陟卿寺久尹京兆位至大司徒繫天下望母
與先公白首相莊早朝退食躬親澣濯潔治肴齋終身未嘗敢
其滄先公薨後兒輩奉母京居仍不離布衣粗糲天性所安非
徒貴不忘賁也年逾八旬髮未盡白齒無一落堅固之體與性
情符偶感寒欬微疾告終烏乎痛哉距生於乾隆戊子六月初
七日未時年八十有二子紹基翰林院編修紹業廕生候選縣
主簿出嗣伯父先卒紹祺舉人雲南廣通縣知縣江蘇候補同
知紹京舉人候選知州孫男四孫女十曾孫一先公墓葬河西
九子山穴土五色光凝有暈倏越十年不敢啟而合窆乃卜葬
吾母於此山穴土相同亦云異矣烏乎痛哉

先妣廖夫人墓志

夫人廖氏先考 經筵講官戶部尙書贈太子太保何文安公

之元配也世居道州西北鄉小坪村小坪本唐營道州故治近接濂溪周子故里山水清奇風俗樸古環村幾千家獨廖氏爲巨戴世有隱德至我外祖贈承德郎諱發點公尤以穆行稱配外祖母何安人先公少失怙恃孤露特立外祖一見器之遂許字焉鄉里蚍笑之不顧也後乃謂廖公能相士吾母自幼明慧幹識精於組紉蔬醢力能扛臼磨乾隆乙卯于歸相先公作苦讀書先公課徒鶴鳴軒脩脯所入善節縮以供賓祀初生男震儒不育嗣孿生紹基紹業逾三晨卽負兒行汲冒嚴寒耐勞瘁農家婦皆自謂不及嘉慶辛酉先公以拔貢入都時紹祺甫生母攜兒就育於舅氏外祖父已先逝舅先瑞一寒諸生且耕且讀吾母姊弟其艱劬孝養外祖母拊畜三子嘗襁兒入山拾薪竹枝傷左目後迄不愈先公官吏部寄書至母以習苦憤不肯

易衣乙丑先公登第假還吾母始受命服歸東門以丙寅冬偕至京師先公自丁卯典粵東試已卯使閩中閒十餘年居大不易修史之暇陶然浩歌家事有無賴吾母拮据屏當以濟後惟視學山東浙江母挈家人至使署餘日皆在京師先公位日高望日隆門下士日盛兒輩次第與科目而素風清節以家法推重日下者數十年由先公從容正直納忠於

朝吾母以勤儉敦壹型於門內也事先公自相莊躬親澣濯酒餌肴齏精潔以進兒婦等效爲之輒不似勤卹戚鄰惠周臧獲先公謂兒輩曰我家根本在汝母一人此語蓋時聞之也已亥秋先公典京兆試紹基典閩試紹京雋南園時吾母大病紹業進藥獲愈旋即病歿先公曰吾門太盛此盛衰倚伏之機乎庚子春先公見背服闋後仍奉母北上時紹基直史館紹祺爲

外吏歲以公事歸省紹京鄉舉後不與會試以專事奉吾母時已見曾孫一堂俞唯顧而樂之然仍長年布衣不御綺縠所嗜飲食惟田家風味親串問安爲語蚤年勤苦瑣屑以示身教蓋淡泊堅定榮悴一致天性自然不可強而跂也已酉春仲偶患痰欬遽以十二月初五日寅時棄養距生於乾隆戊子六月初七日未時年八十有二時惟紹京侍側紹基使粵東先一日旋都母於是日猶兩漉促令赴□園復命次日蒙

成皇帝召對後回家已哀號莫及矣紹祺由江南押運至都甫回蘇聞赴星奔以道光三十年庚戌三月奉柩南旋咸豐元年正月十五日葬於長沙縣北元豐壩之迴龍坡艮山坤向先公葬河西九子山十年矣東西相距三十里青山白雲望猶咫尺

吾父吾母神靈有知其相庇以安奠茲永宅也乎烏乎痛哉謹志

仲弟子毅墓表

道光二十有一年夏四月道州何仲子葬於長沙湘水西谷山之原其兄紹基旣文其藏幽之石又鐫磁版掩於前和復表其略於墓道之碣曰仲子諱紹業字子毅本文安公仲子出嗣伯父馳封光祿大夫健園公諱凌瀛爲子道光元年文安公官祭酒俾得四品廕生以慰伯父心

御試一等以縣主簿注冊仲子澹於仕進不赴選迫於父命九應京兆試非其願也於天文地理律呂六書岐黃之學罔不通詩書畫俱不落宋後究心佛乘疾革時超悟含笑而逝京師傳以爲異黎編修光曙誄之曰來去分明莫作尋常生死看文章

淵奧可容一二外人知蓋紀實也生性至孝先後侍健園公文安公及伯母黃夫人吾母廖夫人疾醫理日遽疾作不自醫遂卒時道光十九年十一月二十日距生於嘉慶四年十二月五日年四十有一文安公爲哀詞深歎其以醫爲孝踰兩月而文安公薨烏乎痛哉娶李孺人繼娶汪孺人子慶深鼎官聯官女二皆幼兄紹基表弟紹祺紹京刊立

仲弟子毅墓志

子毅諱紹業道州戶部尙書何文安公仲子出嗣伯父貤封光祿大夫健園公諱凌灝爲子祖以上諱具於健園公文安公碑志文安公與健園公手足依倚自少孤迄貴仕未嘗暫離仲子與其兄紹基孿生而特爲健園公及伯母黃夫人所鍾愛文安公因命爲之嗣道光元年文安公官祭酒

覃恩得廕一子俾仲子得四品廕生以慰伯父心基與紹祺紹
京兩弟先後南歸應學使試及鄉試惟仲子以國子生屢應京
兆試迫於父命實無志科名蓋終其身未嘗不侍親側也成童
時一病三年病愈後遂學醫脈理造微侍堂上疾諦察於無形
無聲他醫不能參一語後頗聞於
上召見文安公時屢蒙詢獎於基
召對時亦及之且

諭曰汝何以不知醫嗚乎仲子歿逾兩月而文安公薨若基者
尙可爲人子哉仲子神慧絕人於天文儀象律呂六書之學無
不通能以篆分意作蠅頭細書詩筆澹逸自成門徑畫山水得
宋法彈琴引弓精力獨造究心佛乘早悟宗門疾革時屏卻妻
子呼母廖夫人烹雪水啜之執三弟之手端坐語言超邁頓悟

含笑而逝時基典閩試季弟赴南園基在江南行館夢仲子來別曰與兄同來當同去兄事尙多我先去矣問以去向何處荅曰兄當自來何須問我驚寤痛詫時尙不知其病後計入夢之日卽其死前一日也文安公官京師四十余年昆弟讀書聚處又隨侍使節於齊魯吳越之閒文安公門下士錯迹於子舍復徧交當世閎通奇偉之彥顧基性褻直有區畛而仲子恬澹樂易於迹無滯而盡得其歡仲子歿而海內人士皆歎惋之孝友之至洽於友朋理固然也娶李孺人現官貴州布政使李公象鵬女繼娶汪孺人現官廣西柳城縣知縣汪公佳士女生子三慶深鼎官聯官女二以道光十九年十一月二十日卒於京寓距生於嘉慶四年十二月初五日卯時年四十有一道光二十一年四月十三日葬於長沙谷山下竹子沖壬山丙向西距文

安公葬地三里東距健園公葬地五十里北距其前室李孺人遷葬地里許嗚乎仲子慰矣長侍先人於地下矣所云兄當自來者俟之何日也嗚乎痛哉

陳恭人行略

恭人陳氏世居道州北鄉江村古有庠亭地也祖學奎字文亭黔陽縣學訓導父嘉誥字義門候選同知先文安公充嘉慶辛酉科拔貢生是年三弟紹祺始生次年朝考一等授吏部小京官文亭公以歲貢生應北闈鄉試與先公同硯席恭人以庚申歲生遂締姻焉道光元年辛巳紹基偕三弟歸應湖南鄉試始完姻於道州東門外之探花第時文亭公已久任黔陽學官歿於署義門公服闋後家居不出壬午紹祺攜恭人至都事先公及吾母廖夫人能得歡心與娣無閒言先公屢司文柄位

至正卿門人故吏遍天下聲華鼎盛門內澹泊勤儉如秀才時
廖夫人刻勵相莊終身布衣粗糲雖貴盛不御紉綺率婦輩操
作勞實齋蔬酒餌皆閨中手製然諸婦非道州籍往往不應規
度惟恭人同州舊姻椎髻親并曰得濂溪鄉里風味老人尤安
之先公薨後紹祺以舉人就職知縣援例遷雲南廣通縣改江
蘇同知旋以知府調浙補台州府知府保升道員署督糧道恭
人生丈夫子輒不育生女子子三皆長成紹祺既以仲兄子慶
治爲嗣先後納遣室生子慶銑慶熙慶全咸豐庚申二月粵逆
至浙紹祺方署糧道因公出省眷屬寓清泰門賊猝至恭人聚
婦孺訓以大義誓不可爲賊辱二子俱幼先縛沈於池水外孫
女二歲扼吭斃之乃與慶銑生母之母朱孺人同繩就縊閱二
時許滿營兵及民團蜂起賊眾驚遁老僕柳春自外歸慶治罵

賊腦後被斫六刀未死。募人解救得生。言有兩紅鏡前導。忽見
天日而醒。略無所苦。蓋長齋誦觀世音經咒。獲此報歟。朱孺人
竟氣絕不可救。慶銚慶熙入水不沈。妾輩繼縶避入民舍。得不
死。賊退後。紹祺蒙兩江制府檄回杭辦善後。九月膺瘡疾久不
愈。遂力求退。於庚申九月返湘。慶治續娶邢氏。婦甫結褵。罵賊
被賊割兩耳。依其父子尹太守養傷。至辛酉冬。杭州再破。自刎
死。辛酉春。紹基與五弟紹京相繼歸。爲多年來全家一聚。紹祺
以省會繁。暫於夏秋間移居東鄉八十里之小橋莊。戊辰二月
紹祺病逝。慕人率妾及子女輩課耕讀。組紉以度日。亦莊亦
慈。言笑未嘗露齒。鄉間婦多化之。茲於本年九月初十日無疾
告終。神明炯然。蓋無遺憾也。紹基於廿一日得湘中惡耗。設靈
成服。適湘鄉曾相國毅勇侯以制府閣伍至蘇州。與紹祺爲鄉

東洲艸堂文鈔卷一
舉同年欲乞鉅筆表彰侯相允之因書呈行略如此

東洲艸堂文鈔卷十八終

東洲艸堂文鈔卷十九

道州 何紹基 子貞

賦

張侍郎宅看牡丹花賦

猿窠晨起盟漱粗畢值初陽之未紅愛曉天之全碧
芒屨甫繫鏗然杖策游乎曠莽之野入乎迂迴之陌
車塵未動露光可撿花香何來出自林隙正沿緣而
忘返又嬋緩而思息仰而悟曰此天官侍郎之宅也
叩門徑入造乎東園石醜彌倨煙輕可吞有花爛然
錦聚霞竊其豔疑仙發充丰於體態其香昵佛透園
通之鼻根擎妍雲而不墜映嬾日以方暄緣階傍池
雜卉滋蕃臧莊嬉而自得奉此花爲至尊主人不出
翩乎何所排日議官連章奏雨造滕天黎上衛日午
獻納論思勤勞建樹瞻此花其

有知澹臨風而無語閒人往來莓苔迹多衣冠氣體沓拖
今晨何晨幽人見過悵孤芳之邂逅蘇喚夢之委佗態非煙而
欲化顏未酒而先酡乍悠揚而似舞亦腴腆而疑歌猿窵歎曰
百畝之芳或非一叢之敵也十旬之賞或不如一瞬之適也香
風有鄰鄰問何必吾老圃之植也吾其歸乎何忍而與此終日
也歸路方半陰雲乍垂日氣掩匿雨聲驟馳琴書溫藉艸樹紛
披逡巡命酌渺然有思花其如何賦以問之

闕題

法華山人東洲居士隔巷過從近如尺咫一日三晤如楚有喜
三日不見渺然秋水山人書來曰擬卜晝而迫於晚歸擬夜飲
而格於蚤起如何如何念子實多信公勤之鮮暇無退食之委
蛇居士輒然而笑曰天地之道一弛一張人事之變一閒一忙

方吾與君之持節西使也我司學校君職封疆蜀學之煩無山
水之寄興秦寄之重廢文史之倘羊今日何日皆在京邑君典
銓衡夙夜密勿我投閒散消搖于墨鳳翔千仞方乘風而翊霄
鵬息六月方拳趾而戢翼久要尙在相忘語默得閒則聚無暇
則已如同山之雲不必其同起而同止也如其源之水不必其
共濟而其駛也如一樹之花或朝跗而或夕藥也如一璞之玉
或鄭商而或周市也其不同者蓋不僅一晝一夜與一閒一忙
其同者則芳臭潤澤有固結而不可以理也時事未息如波如
濤人意相煎如湯如膏惟山人與居士抱天真而翔翺形雖瘁
而神明不爲之勞外雖紛而內念不爲之囂乍適情於柔翰或
寄興於蜀醪恬乎傲乎韜乎耀乎稚乎耄乎嘒乎歛乎其沈潛
憚怵以觀萬物之妙乎將盤桓奮迅以塞百物之照乎山人聞

之謂居士曰子何聞道之暮而多言之躁乎風風雨雨爲君沈吟花花草草爲君思深蓋將飲君以無波之水而侑之以無絃之琴

酸鹹賦 丁巳五月初八日

酸鹹者吾鄉醃蔬之總名也配鹽而鹹微醃引酸蘿服爲君他蔬繼之日增夜續鮮色不改久而彌芬頃來都門乍缺茲品姪女香雲學製甚精使我饕餮暢焉醉飽是其功也賦以獎之

緊吾之伉慨而建言兮思爲一世之鹹酸旣多蜚於人口兮遂屏棄以自安不復知人間之正味兮舌甜談而誰干雖珍錯之紛列兮長退默而廢餐思故里之醃蔬以吾東門爲最法以簡而得精味由鮮而獲快清破酒眠雋資茶話行過瀧河家家做

賣一到永州味渝色壞我先公之通籍由寒微而驟躋十三世
秀才風味二百年老饕元醯母太夫人躬時寒畦泊乎貴盛布
裘荆筴先公宴客門庭大啟將相公族通家子弟月席風筵肴
珍酒旨冰壺遲進誇奇贊美或乞其餘歸譚婦子痛春暉之見
背兮世擾擾而賢昏寂麥不得滋長兮疏材亦爲之不替斯民
何多菜色兮官長忘其菜根百事固莫可爲兮本性因之不敦
幸投閒而置散兮日把卷而命尊春動花心雨長菜甲汲忘抱
甕行思荷鍾江湖浩蕩鷺鷥習狎甌甌將罄罄曰未乏恃老清
娛粗傳太夫人之法比來都門樂我墳簞友朋近局燕會酣嬉
漸脾神之不適歎菜把之空貽有猶子之不櫛兮能習禮而明
詩知衰翁之癖此兮謂幼曾得訣於祖慈饌有簞而氣闕兮鹽
如乳而味寧鏗齒車而初胞兮沁舌本而勝飴卻盤滄而盡廢

兮劑醉飽而咸宜晨葩躁開宵雨靜落陰晴聽時一日再酌佐
以佳蔬既歡且噱客叩厥理爲言大略吾雖嗜之蓋不解作停
杯忽起疏散腰腳字健如龍吟高下鶴羣兒嬉戲拋塹躡屨笑
伯伯兮老人又齟齬而睡著

擬荀卿蠶賦

以題爲韻

有物焉其象職職其屬雉雉蛻兮若蟬蛻兮若蟻聖者擘桴貽
世溫美蠕動蛻化績孰爲擬儻儻兮若敦烝烝兮遂蕃被茲匹
儔遁於寒屯委吾形兮若塵功天下而不思或云西陵始教吾
聞諸洛誦之孫斯人朴勤肇華日宏青黃赤白總紕昭明混成
兮粲會陽道儼兮肖五行蓋壤飾荒章式具成賁及庶耆衮黼
君卿迺其穉也若叢其欲也既耽既滂葩厥勳如脫於含變化
譎奇萬身莫參育而不害請歸之蠶彼士斲璚子子具具惠利

不咸夸豔自煦孰若此敷溫文布渙爰述爾化力列之五賦

擬魏丁儀勵志賦

以洗心退藏於密爲韻

大考二等十五名

緊大園之寥闊兮澹長空其如洗涵太易以有初兮幹元精而無底中得一而不滓兮羣萌於焉根柢寒威凜其肅潔兮溫澤流其豈悌儼春規而秋矩兮人得之爲仁與禮苟愆志之不虔兮曷仰符乎天體自觴年而挺質兮矜藻思於靈襟幸趨承於鄴下兮廁暉耀於南金逐羣才而輻湊兮鏘仲季之笙琴朱霞飛而晨譙兮白月爛而宵吟谷風起而襲予兮浮雲黯而易陰雖文采之可尚兮竊有懼於予心顧予服之粲粲兮又鞞鞞之璚佩儻斯志之不固兮將外豐而窳厥內彼布帛之無幅兮何由施乎藻纈或穀敝而輪蹄兮豈虛車之可載斟道德之淵泉兮滌心田之蕪穢盍孟晉以前驚兮恐稽迴而又退緬高矩於

在昔令六經森乎禮堂燦先王之陳迹兮示吾道之康莊偉聖
步而賢趨兮猶鼂勉於修藏鍵誠信以爲奧兮樹敬義以爲防
中繩直而外廉隅兮乃威儀之孔臧詎末學之區霑兮恃浮藻
以相羊紛世途之歧軌兮吾恐易乎厥初羌磷緇之易入兮由
閑衛之已疏感君王之渥惠兮侈墳簏之盛譽厲正直以靖其
兮懲偃仰而夸虛絜青雲而思效兮承湛露而樂胥懷簡書其
可畏兮期賢俊以相於渺聖道之靡涯兮陋拘墟於執一倣風
雨於雞鳴兮累錙銖於蛾術洪流濬於涓泉兮玉理發其縝密
抗斯志以邁古兮葆吾心之白日歧篤實而輝光兮吉祥止乎
虛室景元機之不息兮無優游而暇逸

紙賦

以書傳今古契察官民爲韻

大課

一名

客問主人曰蓋聞上古之世羣萌肇初瓜番遠道文字權輿有

結繩之緝緩或契石而粗疏書契既作簡冊紛如削竹爲札以
漆傳諸攷周之策長二尺有四寸度漢之簡謙一尺而無餘厭
質重堅分別部居難以遙寫非可卷舒所爲示法以約同文於
書傳之慎則儒業貴守不假則吏僞祛縑帛之尙筆墨攸便幡
信象其翔翥縹緗綴而聯縣其文欲著非聖所傳乃有黃門給
事家於桂川是矜小慧自詡物先樹膚新而使薄魚網碎而能
全天下稱蔡侯之紙厥世當元興之年誠亦濟於器用詎宜代
乎簡編嘒龍亭之封既渥而東觀之職日專豈云智者創而巧
述之無如有好而下甚焉於是漚麻失布種楮成林易艸木
之本性啟氓庶之機心鈔胥始博蒙僞相尋太常博士始嬭瀆
其授受先王陳迹遂混淆乎古今令甲輕而邦憲寫於私牘左
券執而片牒銜以千金此稗官塵吏所以支離而浩汙此鼠牙

雀角所以軋茁而差參繫哲人之邁古能不太息而彌襟主人
曰遂矣乎子志之勤拙矣乎子言之魯也嘗稽小紙赫蹏班書
可覩在西漢而盛行豈東京之初矩想當運謝赤烏祚歸金虎
溝洫壅而阡陌開郡縣新而封建古事會遷移及乎文府郎中
則爰歷名篇丞相則小篆稱祖伊造紙者何人偕恬筆而利溥
是人工物曲之自然非奇技細娛之同數其用之於書也由古
而篆先分後隸三體寫經入法成勢藏書則四部爭傳名家則
九品可第而且毳椎起而金石增華鏤印精而棗梨不敝洛價
非高曹倉徧惠假如楷氏之興先在成周之世則雖籍去於諸
侯書燔於嬴帝而名山無可罄之藏石室有不鍵之閉最三古
之完書將千載而同契其用之於契也左右別其操長短合其
札諾鳳尾而判僞與真冊魚鱗而納總及積買山之茹禁欺僮

約之文糾黠馬券立而明廉魚書停而誓猾鈔以鈔而幣通印
以印而文察卽在北祝南交東禺西汭飛尺符以指期見萬里
之塊北視昔之節達龍虎民鳩鵲何戒告之諄諄信難乎其
戛戛夫其九沈質淨萬杼聲寒以薄而膩以柔而完直理側理
能復能單太素太樸受墨受丹藏之得壽養之可觀理勝布帛
光若琅玕龕穿鼠齧帙古蟬餐毀不存迹缺則露剝極物理之
巧密洵人事所便安所由二匹四儔咸資其用豈僅墨卿毛穎
獲效厥官乃若文煩則職擾利積則弊囚惟人當善制而物豈
受謨是宜燬蕪編之淆惑護遺經之炳麟馳轡軒而詩采汰覆
瓿於家珍大律揭其炯炯廢牘埽其陳陳庶幾滌紙之謗存紙
之真究紙之功全紙之神政以之簡俗以之醅吾其與子翱翔
藝苑涵泳道津敬仰乎

堯文

義畫長爲瀟瀟悶悶之民

馬射賦

以鳴鞭汗諸人埒塵紅爲韻

大課一名

聖天子文昭育德武貴息爭旣陸讐而水慄咸玉潤而金聲然且南宮角技

北闕掄英審括象星弧之用呈材儲天駟之精念

國家以騎射爲威寄干城而待練合天下選俊雄之士伫勇爵以先鳴開塲倚郭邇陌遐阡秋霜飛而草短曉月印而沙圓鹿角區野鷹眸矚天九州趨駭之才咸振策銜駛而至七萃騰驤之伍亦屬鍵執弭而前想心手之安閑機先貫革望雲天之浩渺氣靜垂鞭何羨乎特勒之貢唐何貴乎余吾之瑞漢惟三羸五驚之皆除抑小領昆蹏之可按白鼻銅精烏雕鐵肝角弓鳴

未竹雙耳以先傾金埒盤餘雲一身而不散顧盼動鸞鈴之響
風葉齊驚光明晞玉露之華雪毛微汗弓三材兮必和矢八法
兮莫假兼利器之調均發英姿之瀟灑健臂懸猿雄心滿馬嬾
伋臧於魯篇詳決拾於周雅霞旌采振照隅目以先紅畫的規
圓訝初陽之正赭步驟從衡烟雲呼吸肉駿飛動鳳舉鴻騫鐵
腕高擎山懸海立身輕鳥過鞘翦水以無聲羽激雕鳴箭流珠
而不澀超遙而雙鐙星明翕忽而四蹏風入人不知馳馬不知
軼塵不及驚日不及映葉葉楊穿聲聲札徹如翰如飛有容有
節去天三尺聞急鼓而盡欲騰空與人一心望長楸而不踰其
埒我弓我矢其馬其人併焉若一用乃如神驥雖馳而戴鶻不
敲理兼動靜鵠已落而控弦未滿勢應屈伸託奇氣於駿骨悟
先機於虱輪可知道器之精能妙通人物乃識英雄之駕馭迴

出風塵爰

臨紫閣更試調弓勵人臣而有鵠待名將以非熊玉仗秋清佳氣近九霄之上星期曉麗奇材超萬騎之中慙儒生之簪佩憶壯志於桑蓬方將

駕扈蒼龍頌華林之汗赭爲羨冠飄翠羽拜

朵殿以雲紅

冊封琉球賦

以道光丁酉修貢請封爲韻

并敘

大課四名

皇帝御極之有七年琉球國世子臣尙育以序當嗣立遣

陪臣

耳目官向大休正議大夫孫光裕貢表奉貢籲請於

朝

上命翰林院修撰林鴻年爲正使翰林院編修高人鑑爲副使奉冊往封將以明歲春啟行所以建邦懷遠甚盛典也臣按琉

皇帝有敕賜賚豐優王妃並錫錦綺疊稠拜

龍光兮奐爛燭鯤國兮遐幽願永祺兮服伏戴

恩波兮泳游慶庭闕之禮成陟

書樓而梯控峙

列聖之雲章懸千尋之寶棟仰

宸訓之峨峨增臣心之洞洞綏禮上賓集僚眾酌蜜林之芳醅

賡太平之雅弄累七寢兮冬臨待一帆兮風送馬齒猶青鯢淵

不凍氣迴望兮疑虬使還歸兮翹鳳蓋銜

命者甫返於周行而表謝者又踰乎常賁已爾乃諏其秩官攷

其疆境自雄長於中山兼南北爲三省王城在中百職是整國

相執其鈞法司佐其柄三十有五之閒切泣以按司三百八十

之邨縣粲乎里井有島卅六監撫分領至繼緒以有邦肅騰章

而上請惟極必歸於厥中斯政乃一於所秉所以風教鬱興兵戎息警長依雲日之光多自鸞魚龍而氣靜也若其山川之磅礴物產之豐茸鵠頭鳳峯鉢嶺金峯瑞泉縵湖砂川赤淙并崆崎以蹇蹇亦浩瀚而冲溶吉茹天芋石芝海松鯨鱗化鹿鰕巨猶龍久米知花之域薩摩野古之衝雖珍物所競湊咸歲事所不供惟

聖天子卻遐方之奇異

示明德之儉恭所由

絲綸敷播瀛裨景從信恢恢乎包天樞而括地軸豈僅僅乎邁禹甸而媲美封也哉

經筵賦

以仲春之月典重經筵爲韻

皇帝御極之十有七載瑞普蘿圖

德凝松棟察七政於璣衡集萬方之琛貢涵濡教澤咸玉潤而金聲被服儒風聽樵歌而士諷共仰

宸樞獨運健行罔閒於時幾猶瞻

經幄宏開鉅典歲占乎春仲青烏司律蒼龍御辰肅九陛之仙仗列千官之搢紳蠖濩珽題

舜戒

堯咨之地煽爛蟒袖皋颺禹拜之臣奎壁臨而文光不夜雲霞曙而

化宇皆春鑪煙篆繞宮漏珠移

鑾輿日麗玉檢雲披惟魯諭示勸民之本惟虞書傳善政之規天聽能卑所冀者嘉謀爾有涓流是效豈徒云肄業及之

敷論章天燭幽得月謂舟霖早卜於弓車謂夏楚有嚴於斧鉞

知人則哲必聰明強毅之兼資主善爲師合愚智短長而莫越
蓋上教貴敷以寬斯民氣之興也勃然旌別者牖人以明而董
勸者養人以善豐盈六府得沃土之滋培涵泳九歌悉仁膏之
流衍傳心務全精一治底平成遵道而泯黨偏風清讒殄繫甌
陶其在和期終始而念典教義相成

君師一統堂陞都俞篇家核綜惟稽古以誨今匪蒯詩而緝頌
蓋道莫備於虞周卽學何區乎漢宋嗤瑣瑣者工銘善賦爲大
夫而稱九能信雍雍乎

議禮考文

王天下必有三重儀成

朵殿宴錫彤庭奏鈞天而有數歌抑戒而同聽邁綠圖之論學
陋白虎之譚經時則和風燕聚瑞靄鑾停挹太液之璿源文鱗

競絢望春煙於瑤島帶草全青失是以

披章夜閣

訪政晨筵總萬幾於一日包九垓與八埏無不秉經爲法執聖之權刊藝林之浮藻斟學海之源泉懿哉道闢苞符參三立極允矣

文垂魏煥於萬斯年

藉田賦

以先知稼穡之艱難爲韻

農爲九職之首食居八政之先惟挾三而挾五乃求萬而求千梁代則觀耕有典唐宗則釋輶維虔丹鞠紀齊書之制青箱補宋志之篇丁亥練時義符陰位乙辰度地制定中阡若歲柔兆而月閏逢實我

皇御宇之二十有二年備萬乘兮

躬履以親耕於藉田迺駕木輅偈金支鯨鐘闔鞞鳳蓋綏六
素虬駟蒼螭騰驤沛艾灘庠穆纒雷動蜚轉雨驟風馳先期
齊平陽靈宿乎頌

祇

天子乃穆然於珍臺閒館琬題碧基轉轉啟啟瀾瀾嶷嶷惟夫
所以總神壹志儲精垂思爲天下

祈福俾萬姓咸知于是景

靈趾而麟開觀崇基以雲跨紉翠幕兮霞竊拖濁渠兮波瀉眺
壺壘以郢分旬營營而鱗亞省功職於司徒設栢屬之掌舍
綵殿霏煙金根稅駕殊鉤盾之修儀匪玉津之觀稼將以合萬
夫而率作故君之言羣將以告民力之普存故藉之言借爾乃
解韻崇

御束之文置輶尊農與之飾撫黛耜與紺轅循砥平而繩直扶
縹輓兮泥皴步青壇兮路織一堡維勤

四推有翼若庶人之代終在農夫之力穡夫惟冒櫛陳根而形
民之力所由鑿井耕田而順

帝之則也時則都人駢望士女豐嫵倚裳聯襪踵接肩隨望
龍顏而日霽瞻

翠羽而星移禮官告備侍從有儀乃紆紅紉載返青旗省農竣
于太史陳饗命乎廩犧設衢尊而賚士頒勞酒以相貽沐
鴻恩之匝洽訶駿發於噫嘻

率天下以敦農廣矣茂矣導斯民而務本先之勞之蓋

皇上念蒼黎之勤恁軫部屋之痼痼劭農重穀思易圖艱五繭
五繭辨上中與下錯一裡一策參保介之御閒登春臺而同趨

上地歌夏甸而並祝南山黃阜白民

德於區陬而共遠杏花菖葉春隨

帝澤以俱頒若乃

廟祧有事肅肅桓桓

天子奉雲陽之璧服通天之冠垂旒摺挺脫舄升壇簠簋普淖
嘉豆饗盤用以答

三靈之貺而臚萬國之歡乃作頌曰

帝永孝思不敢怠安

帝眷民瘼罔或游般協風告至脈發陽癰饗醴載耒夙駕命倌
言藉其農厥思孔覃禮舉儀具粲乎大觀於以知民生之不易
而

爲君之難

祕院藏書賦

以天上玉堂森寶書爲韻

瑤林春絢瑞靄晨圓中繩冊府上界神仙福地紬書見一代文章之大長恩守梘得千秋翰墨之緣何勞玉檢披雲奇搜禹穴幸與金壺校字

寵戴

堯天維祕院之恢閣倚禁城而崇向門登瀛而峻深堂清祕而閑曠聽成樂於軒中來翔鳳於池上溯自木天初啟台衡畢聚於文昌逮乎芸館重修棟宇益隆於大壯

辰居北拱謹詞曹獻納之司壁府東開比佛海華嚴之藏積厥成編詳於最錄充棟連楹籤牙贈玉集成崇庋百家之秀擷珠淵大典猶存前代之楮畱金粟以及經笥史林殘篇稗錄萃羣僚之嘉頌淵雲之妙墨淋漓欽

列聖之

寶章景綬之祥光照燭當平館開四庫才集眾長拂新塵而蝨
逸發古簡而芸香

紫府丹臺蒐祕而琳琅並出名山石室獻書而縑帛先償金蓮
炳曜鏤管參詳譌僞全祛悉稟
裁量於

玉案古今大備如觀服器於明堂既校讐之精審復刊寫以酌
斟亦分藏於院閣要同貯乎球琛試觀乎鼇峯屹屹琪樹森森
步花輶而影麗聆虬箭以聲沈身到蓬萊僊界則謨觴近接客
然藜杖文星則太乙來臨伊昔班書始志藝文劉略早精咨考
四部七錄皆創例以甄羅祕書崇文並因時而構造然而沙磧
不除瑤金匿寶仰美富於

皇朝悉綱維乎聖道蔚矣文同桂海先窺中祕以求津勉哉業
紹薪傳豈僅詞人之揆藻

聖天子經筵道闡翰苑才儲播文明於天下
稽典冊於

幾餘凡在職清而地近無不橐簡而鳴琚美效三長廿四史訛
刊魚魯志成一統千萬年

化洽車書

桐葉知閨賦

以薰風繞帝梧爲韻

仰

授時於

聖代謹觀象於天文因歸餘而閏置比衍卦而奇分兩辰覘運
斗之輝璿璣示憲九寓被

揮桐之化

玉陛調薰時則膏流惠露暖播祥雲歡到農家得胼胝之紓暢
和增夏氣見草樹之益蔭爾乃森然嘉植厥有修桐華千蕤而
綻玉榦百尺而撐銅霖雨將興吐濃雲如潑墨高岡迴立迎初
旭以騰紅本通靈而挺節亦受月而宜風蔭向龍門眷信過桃
花之浪栖來翠羽和鳴諧和黍之簡不見其葉之生乎分左右
以駢滋循氣朔而如曉各六六以相銜疊雙雙而至杪忽有畸
零自成朕兆渾如萼破參差而巧露其餘宛如星垂蔽芾無以
形其小翔鸞集而文鸞么鳳來而韻繞枝枝葉葉偶成物象之
盈虧色色形形竟察天心於微渺於是乎太史推詳疇人審諦
驗余月之積分喜嘉生之合契珪翦諸侯之瑞苑稽正朔以同
頒琴畱樂府之材定叶餘音而善繼蔥龍碧樹偏迎朱輅以陰

濃碣礪東廂恰映左扉而景麗想見滴餘疏雨吟詩來待漏之人試教測到中星齊政溯同天之帝彼夫節覘藕益莢數熨敷樹恒春而耀采草合朔而凝朱咸萃甲於靈性或璘斌乎瑞圖孰若榮依

禁籞秀擢高梧被祥風之披拂承

闔澤之涵濡當

撫辰而熙績亦效智而呈符應噉天上之榆星用無關於推策更聽院前之蓮漏職宜慎於挈壺

瑯珖香稻賦

以百花香裏看春耕爲韻

客有來自江鄉行從阡陌齊魯之交輪轅于役考先民之井地歌惟耦耜者十千話田事於家山憶取禾兮三百顧或雨長新疏風抽宿麥稻乃不宜地非不辟瞥見青疇接水知爲海右之上

腴不禁繡隴停車重問開陽之古蹟爰詢水利舊屬山窪承大
小汶之流春融雪浪別東西泐之堰汎起桃花畫溝塍而刻鏤
喜眺隰之橫斜望岱雲滋液之辰潤入開田時節正沂上歸來
之候風清緯耒人家若夫耕催小卯時及載陽差差迸出澤澤
成行聽千畦之水活篩萬罌而雲涼霏煙媚日見色聞香粘天
不捲未秋已芳可能耕助一犁笑問鐵牛嶺石幾日秧分萬翦
應來小燕湖莊逮夫萬寶秋成今茲禾美場登鴈至之前歌出
蟬鳴之裏羞於君公樂我婦子炊之以柞山之薪漸之以磬湖
之水午甑聞馨宵餐嘗旨勞負米而盈肩忽流芳而滿齒種何
羨乎重思香何誇乎九里便欲書摹禾穗臨將軍澤筆之池何
當樓築稻孫補太守香林之址於是望古長懷臨風遠看雖鄆
國之已墟溯周封之式煥當王室分田之日徐土啟疆迨明堂

覲岳之年以禾馨禱乃藉稻而有行或擣枯而莫扞安得不偕
麥秀而悽神誦黍離而興歎至瑯琊之作郡實漢室之踵秦纒
田有制角澤咸均加以汲尹繼政郊甸行春聽耕田之歌必鋤
非種置搜粟之尉我取其陳想其隕土附根力趁趣耕之令自
卜榮區蔭斤香生觀稼之晨矧今

一人貴穡百室維盈脩渠不開嘉穀挺生或再熟而實好或九
穗而同榮幸值花飛堤曉柳拂山晴隨採風之節臨曬米之城
何須句釋徐陵漫等文人之嗜博且欲賦追潘岳樂觀
天子之親耕

江心鏡賦

以江心波上舟中鑄爲韻

繫神物之瑞世貴利用以安邦玉庇穀而年熟珠禦火而燄降
列上國之六寶映明堂之八窗唐有嘉鏡秉靈大江進於九閭

作人間之霖雨偉茲一握繫天下之耕耰揚州之匠呂暉是任
遇老人之解造偕童子而來臨皓月垂光試閉三宵之戶洪鑪
啟橐空餘百鍊之金宛詣銜雀之奇文居然神識爲想盤龍之
異境知在水心古渡揚子橫江巨波接東溟之浩淼望北固以
嵯峨朱方鶴遠浮玉金多物不遁形識中冷爲水府身無壞法
見南畔之盤陀鎔鞫移來靈驅丁甲風雷鼓處氣攝龍鼉不愆
於五日午時環衛有十二辰相祓不祥以成大祥任神匠斯爲
巧匠奪眞芒於赤日十色五光燭洞壑之幽鍵千態萬狀餘皇
失水爭排飛鷁於煙中大冶騰虛直接眞龍於天上蓋龍之爲
物也得震之象與乾而游司瀛裨之出納處江海之潛幽詘如
蠶蠋信倍鯨虯想其噓氣成雲有歎歎萬流之勢忽乃隱形在
鏡才從衡九寸而周能敎鱗爪皆空幻入承蓮之霽陋彼貪癡

未化驚迴載璧之舟獻自名郡藏諸法宮屬雲霓之在望慮牲幣之難通晃朗出匣蝸蟠繞空長江輸其駭浪靈海佐其雄風澤漑區宇神歸殿中粲千官賀雨之詩豐真有象釋九陛憂農之意寂若無功稽天寶之改元漸明皇之失度然猶民事爲心田功是務故九宮之祀始詳亦三門之渠甫注允宜致此奇珍沛爲甘澍

聖天子藻鑑澄涵盧牟陶鑄喜豐年之爲瑞玉燭調和欽離照之當陽金甌鞏固

水畫賦

以掘地爲池縱毫水上爲韻

有范陽山人結想青霞忘情朱紱石骨娛秀松貌奇崛孕造化於胸襟襲名山於巾拂游趺所經萬景盤鬱抱神技兮忘言匪凡情之可物如虬眠珠而自媚如山韞玉其誰掘李侯詹叔蕭

散同志匪莊匪列亦諧亦契相與張晨絃剪宵穗呼雲晤言與
月醒醉品名畫於虎頭招香墨於蠅鼻握手將別之子何昇忽
斂袖兮轉默似報瓊兮無地三春庭院百步藩籬是模是度乃
厠乃治因規鏡啟汲水瀾移忽澄潭而月占訝掘劍而龍疑波
濤咫尺星斗迷離旣注茲而挹彼則聽客之所爲倚欄兀傲恣
墨淋漓丹青欲化山水方滋矗峰迴兮嶂複屹海立兮雲隨風
吹不捲日照彌奇如傍銀潢而織錦儼臨碧落以書碑神挽謫
以四奔元氣泣而下垂何勞拂素試與臨池李侯見而詫曰水
耶畫耶何雲霞之我供也畫耶水耶何金碧之無縫也是有神
助爲君所用故能潑濃彩而浪飛鑄空波而煙重彼沒骨兮何
奇又通靈兮奚誦願畱一曲之淪漣長付名蹤之超縱山人曰
是固未盡余技也而子又奚勞子旣珍如屏障吾忍付於波濤

試待夫池平日靜翠結朱牢絹鵝溪而質素紙魚網而絲縑仿
硬黃之手拓忽新磴兮懸高聲浪兮萬里微眇兮秋毫一邱一
峰一壑一汊一松一梧一蘋一芷鷗清鶴奇竹秀石詭木末橋
橫雲邊樓起晴雨山醉星霞天綺我欲游兮君云戲耳物之自
然乃有如是謂畫猶疑況出於水於是主客諧際軒屏俯仰午
枕來山晨琴答浪固畫妙之精奇實天懷之飄曠故用水而水
不流寫物而物相況送君自涯他日重訪終當共游五嶽仁子
昆閬覓飛石兮海東控仙風兮雲上

春舟賦

以春水船知天上坐爲韻

遲遲麗景澹澹韶辰香塵撲地垂柳依人簇山翠以醒夢鏡波
虛而寫神千尺深潭誰送孤蓬之客一聲柔櫓驚迴兩岸之春
時則渚淺沙晴千紅萬紫漲欲長兮三篙草一芳而千里聽鶯

深處酒待隨柑鬪鴨暄晨積纔泛汴日坐東風之裏我欲移情
揭來南浦之津春全在水祿渺風煙春心浩然琴樽盞盞蘭芷
年年睇江橫而笑起口水遠而愁牽念無舟其何濟還命權以
遷延薄醉留人有如此三春之水狂歌擊楫盞登乎萬里之船
不見夫天融海豔雲暖霞舒活林巒於旦暮搆晴雨於空虛細
浪徐翻招閒汀之鷗鷺滄波暗長起大壑之龍魚拍蘭橈而徑
渡撫錦袍以何如蓬島何邊鵬程幾千誰能破浪便擬登仙尋
中洲杜若之芳幾點峯青江上攬白下鶯花之海十分春在毫
顛忽奇氣之飄飄眞疑橫漢又遐情之繇繇竟欲黏天舵轉兮
帆張心怡兮神曠共月兮徘徊隨雲兮滉漾已青鞋白袷之相
宜且水枕竹鑪之相向試酌酒兮平濤忽推窗兮走嶂定勝洞
簫秋咽赤壁峰前何勞雪櫂寒支山陰道上獨有悵別魂銷懷

人夢墮望浮雲其無際何處尋君恐綠鬢之易移是誰憶我怨
載舟遙春將情裏是奚若覆劫堂之芥眼前與萬象皆春何如
假太乙之蓮世外逢異人夜坐

秋河賦

以倬彼雲漢爲章于天爲韻

夜氛初定秋心始覺潦淨潭澄花歛露濯席涼院兮爽迎鏡遙
山兮秀琢繁星列布長煙渺邈天九重兮何窮地千里兮有倬
箕斗星精一木一水析之爲津天河起止沾并鉞以瀾肆浸狼
弧而波委異洪流之并渠陋天江之挹彼滋於夏氣麗此秋霽
乘金行之融泄播水祥之氤氲匪繇自直不風而文涵冲星之
龍劍誤浴江之鶴羣乍停法於璧月亦掩映乎鱗雲采現晴餘
痕低夜半橫一帶而銀明徧千家而戶案見梧葉兮始飛聽蛩
吟兮不斷有客神移驚心物換拂新磴以譚天詠舊聞於自漢

河源天使漢節臣持靈檣不泊遠水無湄遇牽牛而渚近睇織
女而梭馳有天孫之持贈待蜀肆而訪之乃知天象宛效人爲
無何支機石爛河鼓星煌依然白水莫認紅牆問雙星其誰渡
知一葦之難杭見溼螢兮自照笑鵲之空忙惟餘雲錦自報
天章時則風疏蘿徑浪起菱湖關山玉笛物候星榆銀漢斜而
月轉天船近而帆孤光爛朗以橫練氣清冷而抱珠曙色升而
澹漾漁歌發而喁于孰與乎

瓊樓暑退玉罽秋偏浥金莖兮露重澄

太液兮波圓左界仰矚觚棱近聯象

壽考之雅化徵雲漢之詩篇仰

作人於多士頌昭回之雲天

新柳賦

以方春著色隨地殊情爲韻

客有韶辰閑暇日下倘佯新醅社甕古錦奚囊仙詩於亭館
馳魚夢於江鄉算來陣陣花風到春三月瞥見依依柳色在水
一方夫其承

鳳闕傍龍津分上林之萼蔚映太液之漣淪宜得氣而最先競
瑤草琪花之色顧迎陽而尙怯乍石泉槐火之晨蓋雖薄植含
生亦自冰霜所鍊要識靈根吐莢仍先桃李而春露茁穉新風
抽線弱染鶯子兮黃嬌懼曉翁兮翠薄點成眉黛鬪十樣以頻
添試到腰支舞千迴而尙削煙有態兮難濃雨飄空兮不著則
有錦市銅街玉鞭金勒芳序相關垂絲漸直溯自吟梅餞臘安
排隔歲春衣記從挑菜花朝數到明朝寒食只合拋殘客思忍
攀濯濯柔條纔知費盡天工始就蔥蔥秀色又或琴齋半掩玳
押低垂展暖頗覺春深未知一聲響出松風喜聞茶熟幾日牆

題竹屋靜待花移忽看陌上青歸雲霞欲活好挂杖頭白打屐
屨相隨時則乳燕飛纔離點轉試遲俊賞兮遨頭怯餘寒兮半
臂聽陽蕭鼓之喧憐穉葉纖柯之膩銀榜認曲江之路煙未
藏樓金尊開春夜之圓月來滿地若夫江南隄苑青韶畫圖固
已十里五里千株萬株東風杏葉之鞍絲盤馬路細雨瓜皮之
艇絮落鴛湖得無因關山之迢越而感物候之攸殊詎知乎氣
晚彌茂春遲轉清矧九烈其來下仁三眠而倍榮所以宅西穀
聚天上星明偕桐芭拂望杏蒲生角弓聞細柳之營呈材較藝
鏤管效長楊之賦頌

德宣情

東洲艸堂文鈔卷十九終

東洲艸堂文鈔卷二十

道州 何紹基 子貞

賦

百步穿楊葉賦

以題爲韻

原夫禮尚和容威恬貫革三耦具而射位明四候樹而賓筵懌
蓋儀不崇者藝不尊抑物不繕者用不適故正鵠取摯鳥之翔
熊虎徵猛獸之格旌揚司馬舉以宮而偃以商命錫康侯弓惟
一而矢惟百然而羽箭呈能機鋒貴裕器不可以滯求理亦難
於莊悟但纖毫之有象如的斯懸經刺蔓而不渝控弦已注射
者由基妙殊恆趣豈獨森嚴壁壘矜徹札以環觀何妨箭蔚長
林試鸞弧於閑步惟楊有葉映水臨煙眉舒綽約腰舞蹁躑遠
睇難分只柔絲之嫋嫋諦觀似削僅初月之娟娟看濃陰之正

匪忽飛鏑兮相連粉絮團餘驚迴燕掠金梭織罷誤認鷲穿重
林之外百步相望量狸步九十而遠越鱗塍一晦而強弦開月
魄鏃迸星芒聽激羽之飈飈餘音彈指正春風之翦翦碎綠成
行蟬乍移而翳破鳥未覺而雲涼知有人兮挾矢方繫馬兮垂
楊矚有遠而皆清勁無輕而不獵淬百發以聯翩顫千條而安
帖曉露爭零飛塵不蹠惟蜻翼可以比其微彼猥枝焉能恃其
捷暫投弓而一笑已驚搖濯濯之姿倘設乏以奏能請視此牂
牂之葉客有旁觀詞含諷喻謂支左屈右之爲勞將弓撥矢鉤
之是懼斯特周臣假設之談聊阻秦將并攻之路要之巧力既
兼形神相遇欣覩

殿前角技浥

宮花

御柳之香還應侍從簪毫邁夏箭唐弓之賦

守口如瓶賦

以守口如瓶防意如城爲韻

富鄭公謝迹朝廊怡情林藪閒看滿縣之花自種當門之柳杖屨春生樓臺月守昔蹇蹇於三朝今番番兮一叟惟是朝議猶咨羣疑待剖名重山中宰相未等懸匏詠傳洛下書生嗤同覆瓿而乃旣耄克勤責躬以厚爰有箴銘借資繩糾思敝甕之爲虞占括囊其无咎詞欲無枝言惟惡莠止於甌與珍如鉞卣胡爲乎瀾翻舌本類積勢以建瓶花粲風前匪有孚而盈缶羌生垢以何心實興戎之自口欲其約也敢弗守諸言祛其宛敬爲之興惟默存而德固亦靜極而理儲祕之於靈臺之府護之於橫津之廬彼挈瓶之有智笑抱器之拘墟然而外觀若隘中藏已虛傾之斯竭存之乃餘信樞機之宛在匪區蓋之相如欲其

何以蓄之下豐其腹何以止之上銳其形項欲其脩擢也竦竦
底欲其安峙也亭亭隱迴紋之夸麗貯止水而涵淳當夫聲聞
就寂風月在庭淵疑籟隔瞻照神瑩雖云康瓠之寶如讀摩兜
之銘羸其者盍鑑於邇捫爾者匪涉於冥睇維瓶而有口思我
口之如瓶且夫器有動靜理有行藏惟恭惟肅知微知彰當公
之迴翔禁苑召對天章敢同瓶隱願效廷揚折新法之謀見除
甌甑安邊之策績固金湯雖默默於爾室必侃侃於朝行所
以天子重金甌之寄僉人無瓦釜之傷何有於卮言之出何有
於民口之防洎夫奉命出疆和戎備使獻納爭兩字之名提封
存十縣之地無不發櫝陳詞懸壺竭智爾無違乎敦槃我何惜
乎佩璫信甘雨之滿缶澤徧華夷同中流之一壺功昭奏議使
其識等抱甄心存忌器何以挫大敵之餘威布朝廷之德意惟

茲旣離朝籍自賦閒居集耆英而樂文史翫山水以狎樵漁瓢
飲自娛謝山中之問答滑稽太拙忘人世之毀譽破大軻而酌
酒命一甌而借書所由箴同朱墨德儷璿璣儼斯彝之在望豈
甌石之所如繫惟有言必慎先民是程每當耄耋益篤懇誠尙
父陳丹書之詞敬慎不怠衛武垂白圭之訓抑戒以虞惟公懋
德望古求精矧昧道而懵學懍執虛如捧盈要惟思虔默禔躬
本虛中爲大器詎僅以文章華

國誇小技於長城

聖人以四時爲柄賦

以題爲韻

成歲在時憲天者聖刑賞昭日月之符經綸協雷雨之令然使
叩冥漠於無言致挾持之失正何以闡化於京垓億兆心操萬
事之根熙工於三百六旬德協五行之盛溯爲公於大道知作

則齊聖人將以十義七情之用範此別聲被色之倫天地爲本而兩儀同其易簡陰陽爲端而二氣肖其調均運竇區於掌握之中錯之猶器順時序得樞機之要用乃如神且夫四時之行也蒙首罔直析其幾生長收藏就厥理日爲遠而月爲循環於亥卽孳於子象朗朗兮日章化搏搏兮無始縱有聰明睿知將聽甄陶於自然豈知淵默凝存乃能左右之曰以蓋惟蕩平正直而極建於中抑亦元亨利貞而德備於四奉時不違如柄斯昇斟靈憲於速遲眠玉衡之抗墜測燠寒於吹管則時以合聲按冬夏而播琴則時以作事粵稽堯象首紀夏時始蟄啟而魚負終鳴弋而隕麋若緯耒攝桑之有次如頌冰出火之有宜惟斗有柄而常懸或在上而在下繫聖有柄而不測夫孰挽而孰推周書時訓家相所爲審二十四氣中朔之節若十有二月賦

政之期於時日月權輿俱起牽牛之次乾坤變易爰握觀象之儀三統正而子姒之規其貫七律作而南北之撰無差至歎魯與蜡賓之游成春秋假南面之柄大一統以書元秉脊王而出政日用判其褒譏歲時稽其朝聘載麟筆而道通九旨其事其文佩象環而氣備四時卽天卽性繁制禮之有原惟用中爲急務天繩地準奉其經秋矩春規遵其度必大柄之不訛乃羣綱之悉附

聖天子玉燭調元靈臺陳數遠邁璣衡七政人時詳夏史之書何勞將相三台天象侈張衡之賦

風不鳴條賦

以太平之世風不鳴條爲韻

稽郅治於坤輿叶休徵於天籟普元氣之和平見仁恩之汪濊蓋惟治暢九垓官清六太所由星徵箕好□□瑞應之圖候應

塵清宛寫昇平之會翳聖神之御極合上下以儲禎飲醴泉之
晨消覘景星之夜明山來露蕤草長華平乃若德符異順號比
師貞宜其鼓盪爲心象兩聞之噫氣鏗訇振響發萬物之春聲
況乎羣卉並茁千章競滋葉乍聶而乍炕節亦高而亦卑□□
天然夙有音聲之樹波濤易作尤聞偃蹇之枝乍披拂以無形
自隨感而應矣喜于喁之互答將□林以聽之而乃不疾不徐
如來如逝方冉冉以生蘋羌溫溫而轉蕙催來雨腳依葉底而
盤桓卷到晴絲又空中之搖曳蓋大能吹垢曾啟運於軒圖而
靜不鳴條且呈祥於堯世爾乃金鋪玉妃桂殿蘭宮嬈香鑪而
靄碧遮寶扇以雲紅三霄晞露五日來風撼到柔條試舞濯龍
之柳森然勁節不驚棲鳳之桐自銅律之能諧冀蒲消長想玉
珂之頻送槐棘西東若夫曠莽之區□□所拂□野水之淪漣

震深山之口崛幾番花信忽李白而桃紅何處蓬飛但桑口而
柳苑微肆好以穆如助羣萌之鄂不察兩儀之用體庶彙之情
惟動乃發非靜不成動自靜生乘空虛而作籟靜由動見過草
樹以無聲所以馳和大酉布化由庚宛同甘雨時霏蕭蘭自潤
豈比驚飈迅起金鐵皆鳴然藉非鴻鈞奠麗象緯光昭則木德
不榮旣盤迂而錯落卽土囊易怒轉激越而蕭條夫惟
聖天子運元模於橐籥感協氣於調刁春樹萬家淑景全囿於
夏旬

薰琴一奏和聲上嫺於虞韶

房謀杜斷賦

以題爲韻

古相臣之重職必碩德之是當資啟沃於心性宏燮理於陰陽
訐謨坐論治具畢張逮後世之臨御倚能臣爲紀綱謀出於智

斷取其剛是惟幽隱咸知堪借箸於前席鋒棱罔挫譬抽矢之
自房昔唐宗之混一徧賢士而延搜襲鄂雄略王魏嘉猷文學
虞褚鈞衡馬劉信稱偉度克集羣謀若夫經綸罔外締構有由
孰爲之運籌密勿作鏡眾流妙算全操若張陳之佐漢太平漸
致同旦爽之匡周則有杖策元齡早通今古好謀克臧先事能
覩稽經誼律收圖籍於隋宮慮遠思深集英翹於秦府推引克
明才資斷剖一言定疑大猷允樹相爲輔車同參肺腑厥後史
臣載筆比爲命之有謔僑當時御坐論功推首勲莫先房杜且
夫善斷者能謀無謀者寡斷豈一事之有成必兩公之交贊蓋
魏國之參謀最早畫長策以無遺蔡公則應變爲長恃神機而
立判觀乎諫高麗之深入雄心務戢其佳兵論世基之不臣大
節特懲其越畔固宜才識相須勛名聿煥圖形列廿四臣之中

相業爲三百年之冠然而化以世隆命由天賦使貞觀之治未興雖王佐之才焉附故前則蕭曹繼踵若創守之相仍後惟姚

宋協心妙寬嚴之異趣稽往昔之堂廉信艱難乎際遇聖天子甌卜求賢繩從式度續奏舉夔望崇伊傅所由異權并

智燭

信符天下無不成之務

三十輻共一轂賦

以當其無有車之用爲韻

仰乾元之幹運涵眾有以包藏惟聖功之行簡成至治於大當本輿蓋平二儀厚原能載達衢莊之九軌虛則稱康高以下爲基握樂御德車之準有以無爲用驗智創巧述之良考作車之法盡制器之宜工聚者多既攻木爍金之並會物參如一貴衡

長車廣以相維然而察車者自輪始卽轉輪者以轂持在輪之內有輻環施因器異宜欲輟爾而欲掣爾取則不遠亦望其而亦眡其蓋輻也者長二尺而不足數三十而相扶日三十度而尙象月三十日而同符并作規圓旋相附麗排如柱密不覺煩紆因股圍而得轂圍一幅亦分乎上下由蚤正而求鼂正兩端悉納於虛無蚤藉牙承鼂惟轂受蚤並列而猶疏鼂同趨而難剖使非載以空中何所容其比耦力惟務稱賢得一而軹得三入恐不深量其鑿亦稍其數故轂之材宜積而宜柔以輻之用惟多而惟有輻無不輳轂妙於虛如三百川之行自地中其歸渤海如廿八宿之燦乎天上其向辰居體則靜專動直象則內密外疏未歌伐輻與伐輪知三材之先轂乃悟會極而歸極必同軌之在車若夫詳一輿之制兼眾理之推車或弇而或侈旌

可結而可綏軸惟奇而較偶蓋欲尊而宇卑載以直方軫虛中而善歛倚乎忠敬衡抱一以能馳合觀乎方萬圜規智亦大矣莫要於直指利轉巧者和之伊老氏之冲夷覽羣情之總統輪輿是喻十二材任得其宜橐籥相通五千言義無不綜聖天子化式九圍

道隆三重

澤敷變輅咸霑美利於不言

治握斗車孰測

大中之所用

麥氣迎秋賦

以題爲韻

昔唐宗稼穡知依圖書自適當翰牘之新揮念農時之不易關心未耜三春已繡錯雲旌寄興郊原萬彙盡膏含雨澤課千家

之作息田歌漸起於良疇規四月之清和天意全鍾乎瑞麥旣
筍紫而櫻紅亦楊腴而棠蒂蓮葉圓初蒲心展未聽鳴鳩於桑
下風雨頻催看挂鳳於桐陰文章非貴幾時醞釀綠雲墮地以
無聲萬頃夷猶碧浪黏天而欲沸由隔歲以滋涵經深春之培
溉種推爲首是先萬寶而秋牟詒自天本備四時之氣秋猶未
至氣已先迎見輕花之自落喜嘉實之將成似有雲蒸並芄芃
而動色剛逢日出咸簇簇以含英香觸鼻以初聞知因風送高
齊肩而欲過乍隔人行山翠如潮映晨畦而煙重溪流灑潤臨
午陌以涼生徑掩衡從之畝宵清守望之樓將登豐於福習苑
應節於商秋錢鋪初閒珠明露腳波瀾欲起銀涌濤頭穗熟全
黃訝瓊霜之乍染鎌新耀白映珪月以初抽試鼓瑤琴正迓薰
風南至仰瞻玉宇幾曾大火西流爾乃望恆龍騰書通魚素方

蘭坂之香飄想桂巖之月駐廿四番催餘花信聽梅雨以聲多
十千耦寫入詩懷展麥光而情注方今

鳳吸雲開

鸞旂澤布爲卜田家獻瑞好上雙歧九穗之圖欽惟

天子重農願陳黛耜紺轅之賦

德車結旌賦

以以德爲美故略於飾爲韻

大課

名

繫經曲之垂型禮必因乎義起雖馳驟之所需有安敦之至理
方偃武而修文貴循塗而同軌觀羣情之輻輳兮駕材力以奔
駛羌車輪馬駟之莫收兮將望景軼塵而未已待馳驅之範我
兮能左右之曰以溯夫車效振達眾工是集後軫轆以能任前
軛衡之務飭人八尺以爲節輪三材不失職上荷蓋而弓張兮
旁樹旌而羽植伊輪轆之爲用兮兼剛柔而並克文明貴和武

事孔力旌其何以旌吾車兮車奚以載吾德旌本注旌而析羽
兮迺一名而眾資旂十二爲大常兮斷三尺而有靈姑丕鳥車
疾而翩翩者纓兮熊虎怒而央央者旗旂有鈴而交龍兮旒長
尋而幅以緇皆倚車以爲建兮旌言進而賅之宜騰舒而到偈
兮象文章之陸離兼威稜之振曜兮亦何莫非道德之所爲然
而仁與勇其殊用兮道與器其相儼惟性府及靈臺兮貴玉亭
而金止歎之欲繫於中兮□心旌之易倚也發之而章於外兮
戒立竿之先庠也意憧憧而莫輕兮幸無爲旃之撓神茶茶其
易紛兮宜慎乎旗之靡也將不內顧而得所箴兮豈恃甚澤者
以爲美也五輅有司巾車是務以祀以寶玉琢金相以朝以田
象皓木素匪革車之卽戎鼉太白以崇樹使其繆練飛揚煙雲
飄驚光采炫日懸旒溢路何以肅帝容整王度凝神示機

節步易簡見禮樂之原靜深通神人之故於是抱蜀無言授綏
有恪鉞八纛兮葳蕤芝九葩兮綰綽望千旌兮結旄映約軼兮
衡錯風塞雨灑兮日月常懸麟儀鳳師兮蛇龍不躍□□□□
兮□□□□左準右繩兮乾剛坤絡乘我車者方宅心於醴粢
穆清謂夫旌者漫馳思於琴麗蠶略禮時爲大惟變所如每同
物而異用著妙理之不居前詘後詘兮覘諸摺笏佩垂佩委兮
視爾瓊琚矧夫樂諧在御閑慎於輿當衡當軹兮朝儀儼煥大
綏小綏兮田事紆徐儀一心結表以麾旗文雖備而不侈道務
攝而戒舒盍卽千旌之建彼而想其德之周於

聖天子治邁登闕神凝淵塞伯偃無塵

皇建有極揚九旗以飛文規萬里於憑軾輻其轂兮風俗同旒
維旗兮民生殖猶且器屏雕幾

化隆惻惻黠續養聰錫鑾有式欽

聖敬於倚衡兮豈行遠必因夫致飾

首夏猶清和賦

以四月清和麥秋槐序爲韻

大課一名

偉車騎之名胄席康樂之崇位廬陵好文而結知司徒見才以
逢忌出守永嘉暫疏民事巾屐蕭閑山水邀恣吁靈壑之際天
倚江城而殷地孕物象而有萬環域中而爲四思單舸以馮虛
待良辰而遠暨律中呂兮如響候長贏兮不闕假大吁茶兮斯
以夏稱陽剛中正兮命之正月覩句萌兮何知徧芳菲兮未歇
簇新禾於畦畛團薄蔭於林樾伊韶華之畹晚詎炎令之候忽
雖徵祉兮應時妙春蠶兮不竭熙熙乎其猶春之和澹澹乎其
猶春之清惟清也故條鬯而不雜惟和也兼滄熱而適平蓋春
爲仁而肖圖象規夏爲禮而以齊得衡當仁禮受施之際見天

地調均之情清如水而百昌潔其容色和如樂而萬籟發其咸
諛矧歸虛之涵納實元氣之包羅巨億載而不凍同萬里於一
波正魚龍之變化喜馮蠡之切和颶風寂其不作輕潮靜而徐
過市成樓而噓蜃山入鏡而棲螺雲霞靚明島嶼委佗矚天遠
以無畔識春餘而尙多乃命舫人挂蒲席沿清甌抵赤石望九
斗之崇岫尋五公之遙跡紛新樹其如薺絢活浪以疑麥石華
馨晨海月照夕烟空露垂怡目悅魄濯征衣而灑紫暖金尊而
日白惟交際乎辰已堪娛寫乎潮汐若夫溫律未叶嚴冬尙適
落樽桑之夜雪沍天漢之迴舟疇能汎鴟夷以迢邁破鯢壑之
寒幽又若陽鑪燄張炎景金流汗南溟之大鵬渴九淵之潛虬
宵月仍灼狂飈不秋亦何能諦百川之委輸乘一葉以泝游信
茲辰之和煦兼卽境而清佳旣已泊石帆於夕渚敞精舍之晨

齋酌南亭之芳桂枕東山之癭槐斯可以尙佯風水滌盪襟懷
拾瑤草而正緇招青霞而與偕方適時而得濟將與物而無涯
第波臣之月令記海候於詩牌迄今沈吟曩篇斟酌時序第首
夏之疑春豈二月以同語況乎左海右江少寒多暑喜孤嶼之
不波揚高帆以容與信乎時弗可違游戒厥阻當
化寓之和熙陟

瀛洲以翔仁豈比乎述撰征之賦而輕鯨與偕吟帆海之詩而
虛舟自處也哉

夫子之牆賦

以題爲韻

大課
八名

惟王建國宅中作都廳金墉之萬雉環紫宮之四隅區以五門
達乎九衢不得其門者循牆而走列於有位者望闕而趨則見
夫七廟之實實枚枚咸丹楹而藻梲百官之踰踰濟濟皆佩玉

而柁朱茂矣美矣巍乎煥乎彼在於牆之外者若耽古之士佔
畢之夫相與攷明堂之位按禮器之圖旣艱遲於目覩羌恟恍
於心摹王者之居以位崇聖人之域由道啟自有生民大哉孔
子譬之宮牆鬱焉聳峙生安植其基下學恢其趾仁智固其夾
持聞見多其積累參之在昔而版築彌堅樹厥儀型而隅稜乃
起平地所成去天若咫尺俛仰焉莫測其度從衡焉莫究其里俗
士趨趨是生訾毀惟端木氏自喻及肩知數仞非可以妄擬牆
之內則宏深晦曖浩汗陸離有六經古文之冊皆先王陳跡之
遺儼左昭而右穆錯夏鼎與商彝三千七十劍佩追隨宛龍虎
之際會分雲鳥於職司當夫講性論德贊易刪詩聖作賢述乾
端坤倪宏規赫其大起眞宰凝而下垂門戶昭晰文章設施山
藏海納百物四時卑者鉅者綱之紀之雖及門之賢智且難得

而備窺無何麟經輟記鳳德歌狂孰變齊而變魯紛歸墨而歸
楊周官脫落泗鼎蒼茫或恃強力欲隳大防詎知夫聖宇崇峻
與天久長跨秦歷漢越晉洎唐宋元而後遺緒彌彰分茅建菴
此界彼疆作干城於大道分東壁之餘光蓋無不屬垣寄廡環
衛於夫子之牆則嘗詢瀆井之復民得昌平之古路舊宅依然
崇墉永護磚壇稽叔節之碑飛陞陋靈光之賦逮瞻乎
辟雍海流繚垣雲互斗明十鼓之文鸞翥千年之樹廊森石經
庭降

轡輅凡遵義路禮門罔弗規行矩步試卽有象之魏義以想無
形之鞏固是何如之孔曼孔碩攸躋攸芋肖
象魏之星懸合寰瀛而景附

歸奇於扞以象閨賦以題爲韻

以聖述聖者易先天而天弗違究六爻發揮之旨握萬物出入之機成卦以還固彌綸乎七政端蓍方始已協應乎三微既賅溫肅於陰陽時以爲柄亦肖盈虛於氣朔餘有所歸伊昔庖羲畫卦幽贊生蓍測荃緯以觀象先闢苞而授規宮辨河圖兼天五地十而有合數成大衍既分二掛一以無差揲驗頻番宛若四時不忒總其餘數非同一算爲奇其爲奇也起於一而非少極於四而難除消長無心自畸零之燦若推詳在手合左右以交於或卽一卽三之互見或爲四爲二以同儲假爾泰筮有常亦正亦羨大哉乾道變化疑實疑虛左手指間措之曰扚左尙德而尊陽扚藉虛而有力終四營而經再扚有數有滋逮三變而就一爻自求自得善投其閒是斟挹元化之方試反以隅乃敬授人時之則不見時之有閏乎甲子初元章部攸始天左旋

而日月右月行遲而日行駛日行三十度有餘而氣盈以形月
行廿九日半強而朔虛以起計十二月得十一日而餘必十九
年以七置閏爲揆溯自六筭鳳叶始致日至而求其詎知一晝
羲開早觀天文而仰以蓋其爲奇也自無名而有名其爲扞也
若成象而非象兩指之際如介兩辰而斗明左位爲宜如闔左
扉而門敞故以奇求一十有八變之卦而累黍成銖卽以閏推
四千六百歲之元而在綱有綱偉著德之圓神括渾儀而佛仿
筮理闕深事歸哲濬豈惟九簪之攸需亦引疇人而並進七日
八月乘除不爽於陽陰後甲先庚消息妙根乎巽震乃當演策
而取餘早若規桐而知閏想見贊生萬益象罔弗賅如云筮短
龜長語難深信

聖天子德合乾坤

學兼理數置閏當余月之餘

授時成天下之務

小臣

識類筭闕見同指布所願吞爰得悟羣

編守孔氏之書何勞製器能精靈憲修張衡之賦

同律度量衡賦

以天下爲公是謂大同爲韻

懿夫升聞協帝稽古同天被絺衣而化洽調玉軫以風宣攷望
秩登封之歲在披圖巡洛之先茂哉瑞輯羣侯合冒圭而如通
符節久矣疇陳五福遵道路而盡泯頗偏乃當嗣位之初基深
念元模之莫假溯自便程伏物固無不如砥斯平卽欲左右有
民亦維是共鑑而治顧治雖紹厥昭明漸宜防其苟且謂道一
風同之不改而何有差池恐倂規錯矩於不知疇若予上下首
同六律命彼太師律謂之分辨秩審兩儀之竅律言乎聿率循
爲萬事之基黃鐘和而左五右五之交應緹室啟而益一損一

以無差被諸笙簫管而咸均更入揮桐之韻推諸度量衡而胥
合無非累黍之爲考律定法信度爲工期寸利尺莧以無歧積
焉成數合從仞橫尋而不爽近取諸躬布有幅以無遷正之於
衣裳冕藻室與堂而並度準之乎總章合宮凡欲絜長而較短
罔弗背私而爲公惟量之嘉審諸臬氏斟斗甬以酌斟辨腹脣
之舛侈頒萬鍾於天祿正釐工庶績之時普三黼於豐年當成
賦九州之始妙益寡裒多之用挹注由茲握量入爲出之源綱
維在是輕重不欺衡懸斯貴集五雀六燕以相宜喻與羽鉤金
而豈謂是惟建中作式執乎兩而用其藉非稱物能施可與權
而猶未平真似水導川思數奠之功器則上衡抱蜀養修和之
氣惟同乎律而庚郵來玉琯之祥惟同乎度而亥步極黃圖而
外惟同乎量而露甕出於山椒惟同乎衡而璇璣明乎夜艾但

旅陽宣氣之求精自審度謹權之悉會故鳳節奏而夔石諧卽
九功歌而萬世賴稽疑散事知皇極不外乎中明日達聰是舜
智之所以大

聖天子金科布憲玉律諧筭

度量兼包罔有華離之地

權衡至當式昭畫一之風

間俗則千家治比

省耕而萬畝占豐隆規溯陟岱以還由南狩西狩而朔狩

至治則如天徧覆信軌同書同而倫同

筆花賦

以夢筆生花文思大進爲韻

緊昔鉅學覃思魁儒伏眾必神聽之相扶乃天才之不韙所以
機符禮器文心妙擅雕龍道重元亭奧業爭傳吐鳳銘紅韉而

龍捷蘇海汪洋吞丹篆而胸恬韓潮瀕洞許公大筆早徵雙管
之祥虞尉精思預兆三爻之夢乃若仙李蟠根長庚入室住峨
眉之峯下古雪盈襟探峴首於江邊臥龍抱膝本山水之英靈
得才思之橫逸固宜探萬古於奚囊鑄雙丸於秋橘豈意肝腸
錦繡尙邀宜楹之餘靈居然文采芳馨爲助仙人之巨筆清風
帳紙暖浪簾旌閑敲竹几淨展蘭笙恍遊春夜之園桃花欲笑
忽遇小時之月桂樹猶榮覺吟魂兮冉冉晦乍斗室兮晶瑩不知
是色是空天然穎出訝爾無根無蒂何處春生是真不律忽正
而葩非秋凝露舒綺成霞三寸擎來倏崢嶸如尋丈一枝秀茁
又掩映以橫斜天香飛而馥郁異采爛而交加只應句濯江波
現秋水芙蓉之影或者神游閬苑發仙山瑤草之花夢醒得月
才涌如雲點人間之新墨播天上之奇芬訪南邦魚腹之臣荃

蓀未老過東國麟經之地匏竹猶聞屬金鑾之摘藻恃管城而
策勛豈惟玉笛花牋雅調儷霓裳之曲想見千門萬戶春聲皆
學士之文無何簪裾寂寞琴酒淋漓睇落花兮似錦藉燕草兮
如絲將近夜郎而看月還侶商翁而採芝憶春風黃鶴之樓梅
花不落記早歲大鵬之賦鳳彩猶嗤幸天涯鏤管難凋歷冰霜
而彌絢問海內芳心孰共渺雲樹以相思爲揆厥元如疑得破
自煥心光宛由神佐非醒非寐根性府以萌芽真色真香粲天
風於咳唾定識仙毫萬蕊滌餘紫海清波要知慧業三生早證
青蓮上座乃假深宵夢幻之因就占一代文章之太士有事業
青箱華年綠鬢翔

玉署以英蹇陟詞壇而力振鑪煙定候人無夢以秋清磚影量
來庭有花而午潤撫供奉之文詞得篇家之心印共一種芬芳

之性驅麝煤鼠尾以忘疲望千秋著作之林陋邱錦江花而有進

知魚之樂賦

以我知之濠上也爲韻

樂意相關幽懷自安本心鏡之恬虛玩物情之細瑣鵬搏息後風水澄明蜨夢醒初煙光澹沲臨濠濮以逍遙忘塵途之坎坷當前活潑大波瀾而小波淪不事區分淇水右而泉源左覽羣生之游泳無待以他平他合在宥而周旋何殊惟我與我有儵魚焉乘流蕩漾逐隊參差款微風其若緒迎細雨以成絲煙晴藻觸浪暖花吹乍迴百尺之瀾同欣鼓舞未上一鉤之月不起驚疑或淩波而赴泊亦掉尾而揚鰭風光洲沚之間但隨天動世界江湖而外豈有人知乃惠子猶見因境闕而莊子已形與神怡我信非魚雖伏難潛乎鱸鮓子固非我相憐徒等於蜉蝣

不見乎汪洋有託涵泳無涯躍亦忘機宛在周文之沼游真得
所非同子產之池何須大壑縱鱗而後樂此卻笑澄潭結網烏
足知之魚方育育我亦陶陶乍相忘於煙水若其狎乎波濤將
化子而爲魚影形自悟將指魚而爲我淡泊相遭吾其魚乎任
天游之浩浩眾維魚矣同性海以滔滔魚不知而我知妙會忽
參乎監水我能樂故魚樂元機偶觸於臨濠彼俗士之趨趨失
天懷之澹澹或涸鮒之相需或陽鱉之自抗盤跚巨浸咸驚鼉
冠之山奮迅懸流競赴龍門之浪錦鱗則文采徒鮮頰尾則勞
形莫暢孰若茲澤國徜徉波心跌宕一川靜對好尋活水於源
頭萬態俱閒緩送斜陽於江上惟造物之無私和天倪而莫假
舟心躍處媿嘉瑞於流鳥琴韻聽時等靈機於仰馬固宜人意
之冲夷恰向溪梁而陶寫我

皇上仁治如天澤敷有夏觀河遠邁堯圖在藻堪追周雅繹寓
言於秋水能知不知爲知之象
化宇於春臺忘適者適之適也

夏山如滴賦

以夏山蒼翠而如滴爲韻

郭氏河陽荆關之亞寫一角之遙山敵千金之高價名縑濡染
變通妙應平時宜緒綸流傳形似直參乎造化吐胸懷之崒崒
鉅筆撫山極水墨之嬉娛閑緣銷夏記嫵媚而笑倩凝淡冶於
屏顏林容開而茂悅石齒粲而迴環幾回細雨斜風餞餘焚尾
到處烏雲雪瀑襯出濃鬢假大天心脫盡三春之景淋漓元氣
鋪成萬疊之山不見乎迷離岫影醞釀煙光建霞標而灼灼帶
雨腳而浪浪方蔭日以成陰浮嵐自碧乍黏天其無際正色同
蒼旣連延而騰擲亦隱複而昂藏積厚斯流莫辨雲根片石合

同欲化全迷樹影千章如滴髓而巖皴如滴珠而泉墜斜陽岫
映滴成布地之金曉霧巒披滴就浮天之翠垂采績於龍鱗壓
蓋葢於鶴翅痕移邱壑橋疑飲澗之虹氣罨樓臺轡重遊山之
騎當夫陰晴不定濃淡皆宜屏九張而露浥螺萬斛而膏施暖
欲生波蹙明漪於巘嶸青來滿郭連積潤於罌罌若夫風雷振
盪草樹紛披瑤岑與繡谷相輝宛如挹注石氣挾松聲并湧欲
作之而於是峰巒靜對絹素徐舒新墨試磨花露滴殘之候香
醪自酌珠槽滴滿之餘毫飛腕捷雨噴風噓合起伏向背以成
奇直洩天倪於真宰想滲漉滋涵之甚厚更追物象於太初信
入妙通靈而不測豈圖鱗畫蜨以能如惟

御苑之澄華接遙嵐而徧覩

蓬山瀛島怡

宸抱之恢台錦樹奇礪被

恩膏之濯滌幸游玉署蘭臺時眺瓊峯翠壁賡歌拜手風來而韻入

琴薰圖畫怡情雨過而涼生硯滴

富貴如浮雲賦

以道德仁義以禮成爲韻

散館一等十名

仰至訓於尼山想純修於聖抱息外慕之紛華懋躬行而濯澡觀其所養潤屋堪比潤身積而能高守官何如守道是以仁山智水悉歸性量之淵淵霽月光風莫罄天懷之浩浩夫以人之欲富也利擬倍三禾思取億政先六府惟期功茂厚生學溯九流不廢書傳貨殖顧養其身尤務養其心周於財何若周於德不墮風雲之志士行如銅將資霖雨之才官箴戒墨抑人之欲貴也離疏釋屨捐笏垂紳綵鸛班與鷺序附鳳翼與龍鱗然而

依日月之光輝道隆黼黻際雲雷之運會任重經綸惟建國綏
猷馭羣臣莫先貴而降衷爲性有尊爵則曰仁誠能則率自天
路由乎義人欣利溥宛書雲而臺盡登春位與德崇如紀雲而
官皆應瑞道體所涵福疇斯備否則心殊白水徒貽象齒之譏
跡躡青霄愈集鵜梁之媿不見乎浮雲乎出岫依稀垂空委靡
色映日而淺深勢因風而起止初無端緒偶同蹙浪生鱗亦有
文章僅等餘霞散綺乘大千而布蔭虛機祇任乎自然仁膚寸
以成霖美利難期其能以乃若矜富貴之崇高懈身心之藏洗
比聯翩於薄靄露墜塵輕試振蕩以清風霄披霧啟想見雲烟
過眼浮榮奚補於儒修何如疏水曲肱至樂妙參乎道體苟求
其本卽聖賢可與同歸有進者機在富貴而知好禮

聖天子中和布德爵祿持平

助紀綱於百吏

廣陶鑄於羣英志明澹泊職勵寅清雲爛星輝捧

日懋三階之治雲興雨降流甘徵萬寶之成

十八學士登瀛洲賦

以題爲韻

玉署英塞金門彥集資謨議於高文效編摩於祕笈望瀛洲之
宇古試溯源流推學士之班清原無階級蓋道尊輔相台垣只
憑乎惟三而職在論思才望早逾於拔十繫天策之崇隆屬唐
示之英察置幕府而雲開萃人材而彙拔迴思義旅三軍英年
下八幸海內之嚮平漸雄心之自劼藉非甄羅俊乂九州之儒
雅偕登何由藻潤乾坤六代之風煙並刷宮城西隅館開文舉
重棟金鋪梅梁蕙幄異丹青之正殿議政論功同醴泉之別宮
細華尚樸聚圖籍之琳琅帶星霞之綯駁僊居縹緲樓臺之掩

繫物理之感通本天倪爲涵煦惟學博而思超如燭照而枚數
張氏茂先名高典午蛻存武庫音聞野而雉鳴劍出豐城氣衝
星而龍吐智罔弗賅精惟所取固宜奇遊獨擅徧緇福地之書
抑且逸韻爭傳妙扣吳中之鼓臨平湖畔積阜崔嵬忽重厓兮
墜岸踰百里而聞雷雲扶鼓現石拔山開自韜伏以千年堅誰
琢玉宛玲瓏而八面滑不生苔叩之不鳴豈以無用爲用質偏
可轉將處乎材不材茂先曰事非可以恆理求而機或以異類
屬也蔚彼修桐產於西蜀培之以雪壑冰嶺蔭之以祥煙溫旭
神鸞威鳳翔舞乎其顛寒狄元狽棲吟乎其足方成雲而播液
一天之風雨能興倘擊石以求音萬里之機緘若觸然猶恐木
石殊性消息難通將善鳴之是假貴浮動以凌空惟魚也樂江
湖之國依蘋藻之中含虛能聽尙象宜工故鏘魚佩於千官低

和玉夏發鯨鏗於萬杵迅啟鐘洪試刻木以成形游疑圍圍較
援枹而甚捷奏定逢逢既雕鏤而得似遂考擊以傳聲息前林
之虎嘯雜午夜之鼙更坤輿之闕響難藏四山互答比戶則趨
塵走看十里咸驚同氣相求宛龍鳴之應鼓象形維肖比鳳羽
之成笙非鱸非簫如晉如鼓震乘木德界入聲聞匪戰鼓之未
衰魚麗成陣異游魚之出聽桐軫來薰謂石本列於絲匏何以
非桐莫叩謂桐自宜於琴瑟何應與石爲羣謂鼓則應魚而朕
兆難尋諸磈礪謂魚能致鼓而鱗鬣乃出自斧斤信神解之能
諳詎常情之所及悟以天然境非意執因思蒐紀岐陽典隆周
邑講武時三銘功鼓十正庸蜀之風同想椅桐之雲立不謂文
垂貫鱗空傳有數之形長令奏息靈鼙莫媿於論之什異矣乎
桐特生而孕奇石不言而含理鼓非革而淵淵魚不波而唯唯

頑者使靈遠者能邇

聖天子化治盧牟

智周翹跂棲桐鳳颺和鈞樂今九成在藻魚歡沐

恩波兮萬里

雨絲煙柳欲清明賦

以題爲韻

春山易陰春雲常聚新綠成團朝氛作縷流觴一詠纔過上巳
重三花信幾番數到佳辰白五步屨藏鴛之塢樹樹迎人關心
畫鴨之晨家家望雨載沿曲浦更繞芳陂新萍渚約淺草離披
盤金埒之寶馬聽江邨之子規依依楊柳濯濯丰姿綰南浦兮
千行當晴猶浪費東風之萬翦計日如絲柳枝欲線雨意先絲
非五色而寒組散千林而曉牽織欲成簾遮住江南之岸買來
誰繡寫將寒食之天未待染時剛生薄暈偶然斷處便起春煙

煙何樹而不籠樹何煙而不受疑重霧於溪頭醫垂條於渡口
盪濃陰兮似水有影都圓裏嫩綠兮凝雲搖風不走助就深春
裊茲弱柳浮笠屐兮全青罨樓臺兮更曲煙痕雨痕兮一片空
濛柳絲雨絲兮千章掩縹滴烏榜兮廉纖穿鳥聲兮斷續猛聽
錫簫粥鼓今是何辰行來花市山帘問君所欲橘花欲豔桐萼
將榮記青探兮舊徑猜白打兮新聲正當春雨小樓詩懷道著
爲認綠楊城郭旅枕還驚漫折來陌上幾枝且待紅榆火活再
聽足山中一夜恰逢紫筍茶清爲憐節近不放春晴看垂垂繞
榭紫廊綰將韶訊正寂寂禁煙挑菜畧遍春城勒懷家於遠夢
遲買酒於芳情識連朝醞釀天工交加冷暖算一歲溫存令節
只有清明乃若

鳳閣霄明

龍池鸞護春旗出而柳色分鑪煙霏而游絲駐雲展葩華波浮
鵲鷺恰是花承

輦路

一人慶敷土之儀先看墦潤坻場千畝上

藉田之賦

應天以實不以文賦

以題爲韻

道貫顯微機符感應人工以代天工天定卽由人定象函三而
敷政教則久則通本太一以制禮儀有宜有稱苟無實意之存
何侈文華之勝漢京賢相名論斯傳謂天之示人也以誠爲本
斯人之應天也以實爲先至威儀之檢攝乃條理之昭宣性曰
有恆降衷必原惟帝文徵諸賁稽古不外同天不見乎太易太
素之先無臭無聲之始萬象未形一元可擬無二無三不偏不

倚道乎名分甲子始因日至而求其道炳陰陽乃觀天文而仰以惟聖道之凝承本惟皇之陰隲崇效則乾統於元健行則日之言實可以與參行之者一雖玉管璇璣之制法貴求精而匏尊菹席之陳禮惟尚質故其應之以心也夕厲晨矜九思四勿懷有赫之監觀嚴無形之齋祓立中生正惟靜與存求慊戒欺不誠無物摺挺垂衣之飾有禮則然潔齊抱蜀之神畏天豈不其應之以事也經緯象其東西柔剛率其張弛斲雕破觚屏惡尊美聲明度數雖巍乎而煥乎春夏秋冬必實以而刑以養民爲政恐傷生物之心節用有經式協好謙之理至若災祥所著得失爰分惕昭昭之響應失疊疊之憂勤受寵若驚紀蒲坂重輪之瑞省躬自責詳桑林六事之文何貴乎疇人之占驗何取乎祝史之紛紜

聖天子日徹旦明聿隆軌度

學惟誠意接千聖之淵源

治貴協中合萬方而陶鑄仰

御論之崇閣本

寶心爲布濩冀後覺於羣倫庶胥全乎昇賦

如石投水賦

以陳善閉邪謂之敬爲韻

漢高祖雄才運世妙略如神驅馳騰灌提挈韓陳獨留侯之多
智與主上爲一身觀謀猷之必用洵契合之有真鑒比澄波能
識人中之傑心同介石偏爲席上之珍稽罕譬之惟工肖一心
於主善如石而質尙堅剛如水而流非清淺一卷自守完太璞
以韜藏萬派咸歸異狂瀾之漫衍投焉非暗敢同珠玉之懷受
以能柔不待淄澠之辨當夫草澤沈淪衡門侘傺黃石初逢素

書猶閉沙飛博浪瓦幾毀而難全履進圯橋玉可攻而彌厲詠
南山之石爛流水常閒待北海之風清大川共濟逮夫聞關既
久遇合堪誇初說項王逞韜鈴而計阻旋依漢室居帷幄而猷
嘉奇謀決勝正論閑邪抱硜硜而自信入浩浩以無涯運大度
以雄心深同江海陋羣材之小智用等泥沙惟臣躬以獻替爲
忠惟主德以含容爲貴藉非載以恢闊精其經緯將齊貴賤於
玉珉混清濁於涇渭受益無由責難何謂縱他山之爲錯磊落
英多嗤古井之無波差池臭味真人豁達隆準魁奇精神相得
蘊納無遺如石赴水而渾忘圭角如水涵石而靜漾漣漪緬嶮
崎歷落之懷不可轉也惟溥博淵泉之量實能容之棧絕而三
秦遂定印銷而六國終墮賴子房能砥柱中流想楚漢鴻門之
會封畱邑而泰山如礪報君臣魚水之思願其專尚兵謀非關

王政猶因際會之隆克致勲名之盛懿夫

紫闥垂恩青蒲納諍

齊七政而在衡台萬流而仰鏡澤山占象知受人不外能虛星
日爲

文仰

修己無非以敬

東洲艸堂文鈔卷二十一終